

EI (BiH i Euro integraci)

BiH – RCC

BIŠČEVIĆ: PRIORITETI SU NADOKNADITI IZGUBLJENE GODINE

SARAJEVO, 28. aprila (FENA) - Kada se pogleda društveni i gospodarski život u jugoistočnoj Evropi, vrlo lako se uoči da su prioriteti, u strateškom smislu, nadoknaditi izgubljene godine u kojima nije bilo dovoljno ekonomskog i socijalnog razvoja, zbog razloga koje svi dobro znamo, izjavio je večeras za Fenu generalni tajnik Regionalnog vijeća za suradnju (RCC) Hido Bišćević, u Sarajevu pred početak panel diskusije „Budućnost regionalne suradnje u jugoistočnoj Evropi“, čiji organizator je Pakt stabilnosti JI Evrope.

Bišćević smatra da „tih dvadesetak godina, koje su prošle nažalost u ratovima, materijalnom razaranju i manje-više uspješnim i neuspješnim tranzicijama, treba uzeti kao polazište da se maksimalno ubrzano krene naprijed“.

„Jer, u ovom dijelu Evrope, naročito u postjugoslavenskom prostoru, u velikoj mjeri u novim zemljama, došlo je do zaostajanja za ostatkom Evrope u socijalnom, gospodarskom, duhovnom i mentalnom smislu i tu treba ubaciti u treću, četvrtu brzinu i nedopustiti da preostala otvorena pitanja onemogućuju normalan razvitak, normalnu izgradnju cesta, željezničkih pruga itd.“, kazao je Bišćević.

Govoreći o danas održanoj prezentaciji prioriteta i osoblja RCC-a, koji je nasljednik Pakta stabilnosti i čije je sjedište u Sarajevu, Bišćević je naglasio kako je ustvari riječ o „na neki način javnoj prezentaciji prijenosa ovlasti s Pakta stabilnosti na naše vijeće za regionalnu suradnju“.

„Specijalni koordinator Pakta stabilnosti dr. Erhard Busek i njegov tim jutros su bili u prostorijama našeg vijeća. Obavili su medijski zanimljivu prezentaciju od jedne na drugu posadu, a večeras ćemo pokušati izvijestiti medijsku i političku javnost u BiH o tome kako ide proces uspostave tog vijeća i dokle smo došli u pravnim, administrativnim i drugim procesima, koji su to prioriteti Vijeća i šta ćemo od naslijeđa Pakta stabilnosti nastaviti raditi“, izjavio je Bišćević.

On je u izjavi za Fenu naglasio kako su prioriteti Vijeća obnova i unapređenje suradnje u sektoru energetike i infrastrukture.

„Dvadesetak godina razni koridori 'stoje na stolu' i razni projekti. Vrlo malo se radi, u ograničenom dijelu zemalja“, dodao je.

Generalni tajnik RCC-a smatra da su gospodarska i trgovinska suradnja u usponu, ali nedovoljnom. Mišljenja je da treba ojačati regionalni aspekt gospodarske suradnje i da je „dobro što imamo novi ugovor CEFTA-e, koji olakšava i realizira regionalnu trgovinu i omogućuje nekim od zemalja koje su udaljenije od EU i evropskog tržišta da to bude neka početna škola“.

Upitan kako vidi BiH sada, prije potpisivanja SAA, Bišćević je odgovorio: „Da može brže, bilo bi bolje“.

„Promatrajući politički život sada, malo iz neposrednije blizine, mislim da treba ubrzati proces odlučivanja. Imam osjećaj, a možda griješim, da politička klasa u BiH nedovoljno odražava htijenje građana i očekivanje ljudi. SAA je na neki način postao simbol nade da se može krenuti naprijed i dalje. Kao i sve zemlje jugoistočne Evrope koje nisu završile svoje statusne probleme, ni BiH nema luksuz vremena da čeka“, odgovorio je generalni tajnik RCC-a.

(Fena) mb